

Urteko 29. Igandea (B)

LEHENENGO IRAKURGAIA

*Bekatuen ordainetan
bizia eman zuenean,
ondorengoak izango ditu
eta bizitza luzea.*

Isaias liburutik 53, 10-11

Jaunak oinazez josi nahi izan zuen.

Eta bekatuen ordainetan
bizia eman zuelarik,
ondorengoak izango ditu
eta bizitza luzea,
eta haren bitartez
bere nahia burutuko du Jaunak.

Jaunak dio:
«Hainbat neke jasan ondoren,
argia ikusiko du eta asea izango.

Bere ezagutzaren bidez,
nire zerbitzari zuzenak
asko egingo ditu zuzen,
haien erruak
bere gain hartu baitzituen.

Jaunak esana.

SALMOA

Salmoa 32, 4-5. 18-19. 20 y 22

R.

*Betor gurekin, Jauna, zure maitasun leiala,
zuregan jarria baitugu esperantza!*

Jaunaren hitza zuzen-zuzena baita,
haren egintza guztiak fidagarriak.

Justizia eta zuzenbidea maite ditu;
Jaunaren maitasunaz betea da lurra. **R.**

Jaunak ditu zaintzen begirune diotenak,
haren maitasunean itxaropen dutenak,
heriotzatik libratu eta gosetean bizirik gordetzeko. **R.**

Guk Jaunarengan dugu itxaropena:
bera dugu laguntzaile eta babesle!

Betor gurekin, Jauna, zure maitasun leiala,
zuregan jarria baitugu esperantza! **R.**

BIGARREN IRAKURGAIA

Hurbil gaitezen, bada, konfiantza osoz Jainkoaren onginahiaren tronura.

San Paulo Apostoluak Hebrearrei egindako gutunetik 4, 14-16

Beraz, gure apaiz nagusi handia, Jesus Jainkoaren Semea, zeruan sartua dugunez gero, euts diezaiogun sendo aitortzen dugun fedeari. Izan ere, gure apaiz nagusia ez da gure ahuleriaz gupidatu ez daitekeen norbait, zeren eta bera ere, gu bezala, gauza guztietan probatua izan baita, bekatuan izan ezik. Hurbil gaitezen, bada, konfiantza osoz Jainkoaren onginahiaren tronura, errukia iritsi eta premialdian laguntza izan dezagun.

Jaunak esana.

Aleluia Mc 10,45

Aleluia, aleluia.

Gizonaren Semea zerbitzari izatera etorri da,
bere bizia guztien alde ordainsaritzat ematera. Aleluia.

EBANJELIOA

Gizonaren Semea, bere bizia guztien alde ordainsaritzat ematera etorri da.

+ Jesu Kristoren Ebanjelioa San Marcosen liburutik 10, 35-45

Denbora haietan, Santiago eta Joanez, Zebedeoren semeek, Jesusengana hurbildu eta esan zioten:

– Maisu, eskatuko dizuguna zuk ematea nahi genuke.

Jesusek galdetu zien:

– Zer nahi duzue, bada, niregandik?

Eta haiek:

– Zu zeure aintzara heltzean, bata zure eskuinean eta bestea ezkerrean jar gaitzezela.

Jesusek esan zien:

– Ez dakizue zer eskatzen ari zareten. Gauza al zarete nik edan behar dudan edari saminetik edateko, edo nik murgildu behar dudan uretan murgiltzeko ?

– Bai, gauza gara – esan zioten.

Jesusek, orduan:

– Nik edan behar dudan edari saminetik, bai, edango duzue, baita nik murgildu behar dudan uretan murgilduko ere; baina nire eskuin-ezkerretan eseri ahal izate hori, ez dago nire esku inori ematea; Jainkoak norentzat prestatua duen, hari emango zaio.

Beste hamarrak, hori entzutean, Santiago eta Joanen aurka haserre jarri ziren. Jesusek dei egin eta esan zien: «Dakizuenez, herrien buruzagi direnek menpean hartzen dituzte herriak, eta handi-mandiek beren agintea ezartzen diete. Zuen artean, ordea, ez du horrela izan behar. Zuen artean handien izan nahi duena izan bedi zuen zerbitzari. Eta zuen artean lehenengo izan nahi duena izan bedi guztion morroi. Zeren Gizonaren Semea ere ez da etorri zerbitzatua izatera, zerbitzari izatera baizik, bere bizia guztien alde ordainsaritzat ematera».

Jaunak esana.

Blog: <https://homiliaspagola.blogspot.com/>